

Date – 16/09/2025

Time - 18:30 Hrs

HEADLINES (EVENING)

1. Chief Minister Pu Lalduhoma leh Minister dang ten vawiin khan Tualpui khaw lo zawhpui an telpui.
2. CSS hnuaiia thawk intelkhawm pawl AMCECC chuan vawiin khan Mizoram hmun hrang hrangah sorkar laka lungawi lohna an lantir.
3. Union Home Minister Amit Shaha chuan ramchhunga ruihhlo do turin sawrkar laipui leh state sawrkarte thawhho that a ngai a ti.
4. Vawiin khan World Ozone Day hman a ni
<><><>

CM

Chief Minister Pu Lalduhoman vawiin khan Tualpui khaw lo zawhpui a telpui a,

Association of Tour Operators Mizoram (ATOM), Tourism Department leh Agriculture Department tangkawp ten Agro Tourism chawikan nan Lo Zawhpui hi an buatsaih a, Champhai North bialtu MLA Pu H. Ginzalala chu Lo Zawh thlengtu niin Director Tourism Department Pi Lalrodingi'n hun a kaihruai a ni.

Chief Minister Pu Lalduhoma chuan thusawiin thingtlang lo neih chu bansan thut theih a ni lo a, zawi zawia kalsan a nih theihna turin Sorkarin hma a la mek zel a ni a ti a. Lo zawh hi Tourism anga kalpuia khualzin tam zawk khaw dangah hip thei tura ruahhmanna kalpui mek a ni bawk a, Tualpui khua in ramngaw a neih that vangin Model village atana thlan hial a ni a, a thawktu tur company nen pawh inremna thuthlung pei fel thawkhat tawh a ni a ti.

Khualzin te hip thei turin hmasawmna tam tak a keng tel dawn tih sawiin nasa taka cheibawl tur ruahmanna siam a ni a, khawtual mipui te pawhin khualzin te dawngsang thei tura hawihhawmna te neia mi pan chak ni tur hmanlai thil hlui humhalhna kawng tan la sauh sauh turin turin a chah bawk a ni.

Champhai North bialtu MLA Pu H. Ginzalala chuan lo zawh runpui an uar chho chu ram pawn mite paw'n an hre thar nasa hle a, hei hi lo neitute tihchakna bakah zin mi te hipna hmanraw pawimawh tak a ni a ti a, chhawm nun zela tun aia changtlung zawk kalpui a nih theihna turin taima taka hna thawka, ngaihtuahna zau zawk nei turin kalkhawm te a sawm a ni.

Lo zawh runpuiah hian Education Minister Dr. Vanlalhlana, Forest Minister Pu Lalthansanga leh Adviser to CM (Political) Pu Lalmuanpuia Punte te pawh an tel a ni.

<><><>

KAWNPUI-HORTOKI

Kawnpui leh Hortoki inkar kawng enkawl hna chu Mizoram PWD kutah dah a ni leh tawh dawn a, Railways lamin a tul dan a zirin hmanrua an neih ang te hmangin hna an thawh pui thin ang.

Vawiin chawhnu khan Kolasib DC Office chamber ah Kolasib DC Pu Robert C Lalmangaiha kaihhruiin, Kawnpui leh Hortoki inkar kawng enkawl dan tur sawiho a ni a. Meeting ah hian Kawnpui leh Hortoki inkar kawng chu Railways lamin an hman lai kha chuan an hman chin hi a chhiat changin an enkawl a, a bak zawng Mizoram PWD ten an enkawl thu tarlan a ni. Hei hi CM hova an meeting thu ang a nih thu tarlan a ni.

Hetihlai hian Railways hnuaiia Contractor ten an hna an thawh zawh tawh avangin he kawng hi bungraw lakluh nan an hman ang tawh lo tih tarlan a ni a. Hei hi a kaihhrui VC te pawhin an pawm thu an sawi bawk ani. Hetiang a nih avang hian Kawnpui leh Hortoki inkar kawng hi Mizoram PWD ten a tluanin an enkawl a ngaih tawh thu Kolasib DC chuan a sawi a. Railways lam pawh a tul angin MPWD te puih an ngaihna ah pui turin a ngen bawk

Meeting ah hian Railways lam aiawh te bakah Kawnpui SDO(C) Dr Doris Lalrinawmi, PWD Kawnpui Sub Division aiawh te leh Kawnpui leh Hortoki khawtlang hruaitute an tel ani.

<><><>

CSS PROTEST

CSS hnuai thawk intelkhawm All Mizoram CSS Employees Coordination Committee AMCECC chuan vawiin khan Mizoram hmun hrang hrangah sorkar laka lungawi lohna an lantir.

Aizawl District Magistrate-in thla 2 chhung Sawrkar Office awmna hmun hrang hrangah mi 5 aia tam punkhawm khapna tichhuak mahse Aizawl district-a CSS hnuai thawkte chu vawiin khan Vaivakawna Joint YMA Field-ah pungkhawmin lungawi lohna an lantir a. He hunah hian AMCECC General Secretary Pu Vanlalpeka chuan thusawiin, sorkara an thilngiat nawr nan kumin April ni 15 atanga ni 17 chhungin pen down strike an lo nei tawh a, DP&AR Minister in theihtawp chhuaha bawhzui a tiam avangin April ni 19 ah sorkar nen inremna an siam a, May ni 19-a representation an thehluh chu August thla tawp lama an ngaihvenin, an lehkhah thehluh a bo thu an dawng a, an chhui zelnaah file engmah a kal lo tih an hmuchhuak a ti a, inremna an siam hnuah sorkarin a ngaihtuah ve mai dawn emaw an tih laia a ngaithah chu hreawm an tih thu sawiin, September ni 3-a general body thukhawm chuan nawrh huaihawt an rel a ni a ti.

Vawiina AMCECC lungawi lohna lantirna hi Mamit, West Phaileng, Marpara, Kolasib, Pukpui, Vairengte, Kawmpui, Champhai, Farkawn, Darlawn, Sialsuk, Lawngtlai, Chawngte, Bualpui, Sangau, Lungpher, Lunglei, Zobawk, Tlabung, Siaha, Tipa, Saitual, leh Phuaibuang ah te pawh neih a ni.

AMCECC hian Mizoram sorkar laka an thil phut hrang hrang chungchangah thu lawmawm hriat tur a awm loh avangin lungawi lohna lantir nan tun thla September ni 9 atanga ni 11 thleng khan Mass Casual Leave an lo la tawh a ni.

<><><>

GST REFORM

Sorkar laipuiin Goods and Services Tax (GST) a siamthatna hnuai chhiah a hniam chuan mipui sumin a lei theih a tam sawt dawn avangin economy chu nasa taka invawrh chho tura ngaih a ni a ti

Akashvani Aizawl chuan sorkar laipuiin GST a siamthatna GST 2.0 chungchangah mithiam hrang hrang a kawm a, hetah hian PUC-a Economics assistant officer Pu Daniel Lalawmpuia chuan sorkar laipuiin September ni 4-a GST siamthatna liantham tak a kalpuina a, a tum ber chu ram chhunga middle class leh sum lalut tlem zawkte khawsak awlsam zawkna atan leh thil an lei atanga economy chevel tihmasawn a ni a ti a, mithiamte chuan chhiah tih hniamna avanga mipui nawlpui thil lei belh tamna tur an chhut chu za zela 5 atanga za zela 10 vel zet a ni tih sawiin, chhiah a hniam chuan mipui sumin a lei theih a tam sawt dawn avangin economy chu nasa taka invawrh chho tura ngaih a ni a ti.

Pu Daniel Lalawmpuia chuan GST rate thar hnuai thil man tlahniam zingah lirthei man te chu a nuai dawna a tlakhniam dawn avangin lirthei lei tumte chu September ni 22-a GST thar a taka hman hun nghak turin a chah a, lirthei bakah hian nitin mamawh sabon atanga toothpaste te, nunna atana damdawi pawimawh (life-saving drugs), car tenau, two wheeler, TV, AC, insakna hmanrua cement leh loneihna lama hmanraw pawimawh tak tak te a tel tih sawiin, GST tihhniamin a tum ber chu ram chhunga mipui nawlpuite phurrit tihhniam a ni a, hun rei vak lovah chuan chhiah hmuh te a tlahniam tura ngaih ni mah se, hun a kal leh deuh chuan in recover leh thei tura beisei a nih thu a sawi bawka a ni.

<><><>

SEVA PAKHWADA

BJP Thalai (Yuva Morcha) chuan Prime Minister Pu Narendra Modi-a piancham lawm nan Aizawl ah Marathon Race a buatsaih dawn a, ram intodelh leh ram changkang ni tura thalaite’n hriselna an ngaih pawimawh a tulzia inzirtir nan leh mi harsa zawk tanpuina kawngah pawh a kawhmuhtu an nih theih nan he marathon race hi an buatsaih dawn tih an sawi.

Vawiina Aizawl Press Club-ah thuthar thehdarhtute an kawmnaah, BJP Mizoram State Yuva Morcha President Pu Robinson Malsawmtluanga Hmar chuan kum danga an lo tih tawh thin angin, Prime Minister Pu Narendra Modi-a piancham (September ni 17) leh India hnampa Mahatma Gandhi-a piancham (October ni 2) inkarah midang tana luanchhuahna hun "Seva Pakhwada" an buatsaih leh dawn tih sawiin, ram pumah September ni 21-ah marathon race buatsaih a ni dawn a, hetihlai hian 'Chawlhni' a nih avangin Mizoram ah chuan September ni 20 (Inrinni) ah Aizawl Bawngkawng atangin Ramhlun veng lam kawngah tanin Lammual thleng buatsaih a ni dawn a, Mizo thalai a tam thei ang ber tel ve turin a sawm a, he hunah hian a tlan zawng zawngte chu certificate leh T-shirt hlan an ni vek dawn a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

MIZORAM CIVIL SERVICES

Mizoram Civil Service (MCS), Mizoram Information Service (MIS) leh Mizoram Finance & Accounts Service (MF&AS) Officer Trainees 34, Administrative Training Institute (ATI), MINECO, Aizawla Foundation Training nei mekte chuan vawiin chawhnu khan Larsap General (Retd) Vijay Kumar Singh chu Raj Bhavan-ah an kawm.

Larsap chuan officer training mekte chu mipui rawngbawl hna thawk tur an ni tih hriaa inpekna leh thahnemngaihna nena hna thawk turin a chah a. Danglamna thlen thei dinhmuna an din hunah hmasawwna leh danglamna thlentu nih tum tura fuihin, Officer tharte chu digitisation ngai pawimawh tur leh an thiamna leh theihnate tihpun zel tum tuin a chah a, an hna thawh chhan mipuite dinhmun hria a, policy an siamte an chhawr tangkai theih nana tan la turin a chah a. Hna thawh that avanga mite'n an hriat reng mi nih tum turin a fuih bawk.

<><><>

UNION HM

Union Home Minister Amit Shaha chuan ramchhunga ruihhlo do turin sawrkar laipui leh state sawrkarte thawhho that a ngai a ti.Vawiina National Conference of Anti-Narcotics Task Force vawi hnihna a hawwnaah he thu hi sawiin Pu Shah-a chuan Drgu-Free India Campaign chu ramchhung district 372 ah kalpui mek anih thu a sawi a. He campaign ah hian mi vaibelchhe 10 leh zirna in nuai 3 chuang an tel tih a sawi a. Central leh State sawrkar hnuaia department hrang hrangte tangruala ruihhlo an do a tul tawh thu a sawi bawk a ni. Conference ah hian state leh UT 36 atangin Anti-Narcotics Task Force hotute an tel a ni.

<><><>

WORLD OZONE DAY

Vawiin khan World Ozone Day hman a ni a. He ni hi ozone layer pawimawhzia inhrilh tharna ni atan hman thin a ni a. Kuminah hian thupui atan Science atanga khawvel huap hmalakna tih hman a ni a. He campaign ah hain science hmanga thil hmuhchhuahte behchhana policy siam leh khawvel ramte thawhho a tul zia uar taka sawi a ni a. Khawvel environment siamthat kawngah ram zawng zawng tanho a tul thu pawh sawilan a ni bawk.

<><><>

GST

Prime Minister Narendra Modia'n kumin Independence Day lawmnah GST chhuan thar hman a nih tur thu a puang a. Hei hi tun thla ni 3 a GST Council thukhawm chuan a taka rawn ti puitlingin chhiah lak dan chhawng li ni thin chu chhawng hnihah titlemin awlsam zawkin a rawn siam danglam a. GST zaa 5, 12, 18 leh 28 a lak thin chu zaa 5 leh 18 ah tihhniam a ni a. Mi naran leh mi nawlpuite tana hlawkna thlen thei tur berin he GST hi siamrem a ni.

Sawrkarin GST rate thar a siamah hian zaa 12 atangin zaa 5 a lakna te hi mipui nitin mamawh leh mi naranten an lei nasat bungrua te a ni a. GST COuncil chuan pheikhawk cheng 2500 chin aia hniamah GST zaa 12

atangin zaa 5 in a tihniam a. Heng bakah hain thing, lung leh thir hmanga milem kerah te GST zaa 5 lak a ni a. Chartered Accountant leh taxation T Suresh chuan tuna GST dan thar hian ramchhungah a tha zawkin rah a chhuah dawn tih a sawi.

<><><>

SEVA PARV

Mipui rawngbawl leh sawrkar inrelbawlna tha tih thupaia neiin Prime Minister Modia sawrkar chuan hmasawwna thlen turin theihtawp a chhuah a. Tun tum Seva Parv pualah chuan Modia sawrkarin sik leh sa chhe mek siam tha tura hma a lakna te tarlang ila. India hi ram thang mek anga hmuh niin energy lamah mamawh ngah tak angin ngaih ni mahse khawvel sik leh sa siamthat kawngah a hmahrulaitu a ni a. Kum 11 liamta chhung khan ramngaw humhalh atanga solar rooftop te, boruak bawlhhlawh pe chhuak tlem lirthei tihlar kawngahte India chuan nasa takin hma a la a. Hmasawwna leh chhehvel nungcha humhalh hi a kalkawp thei tih a lan tir a ni.

<><><>